

Aunghel pertgirader miu.

Cura che mia mumma ni in da mes fargliuns pli vegls mettevan mei la sera a durmir astgavel jeu adina giavischar in'oraziun avon che clauder ils eglis. Jeu havevel duas oraziuns preferidas. L'emprema fuva quella digl aunghel pertgirader che tuts enconuschan. Cun vusch migeivla vegneva lu tala recitada e quels tuns audel jeu aunc adina en mias ureglias:" Aunghel pertgirader miu. Daus a mi dil car bien Diu. Da mei hagies po quitau. Mei pertgira dil puccau. Meina mei sin trutg segir- e lai mei enten tschiel vegnir. Amen"

La secunda oraziun preferida da mei fuva la suandonta:" Segner car pertgira nus scolars sin nossa via. Mantegn a nus adina la legria. Ti che fas crescer cun bellezza tut las flurs, seigies er per nus il bien pastur. Amen."

Ina sera suenter che mia mumma haveva mess a letg mei e mia sora ch'ei treis onns pli veglia che jeu seregordel jeu dil suandont discuors. Suenter che nossa mumma veva sco bia autras gadas recitau l'oraziun aunghel pertgirader miu e finiu cul plaid "Amen" ei mia sora semessa si dretg ed ha detg.

"Ei dat gie gnanc aunghels". "Pertgei?" damonda la mumma e sesa sin siu letg. „ Perquei che aunc mai enzatgi ha viu in aunghel!“ „Tgi pretenda quei?“ „Alfonsina – ed ella sto era buca urar avon che durmir ni avon che gentar sco nus.“

„Quei pertuccont ils aunghels constat per part,“ rispunda nossa mumma. „ Vesper sas ti buc ils aunghels, denton sentir.“

„ Quei s'imageschan carstgauns giuvens mo, gi il bab dad Alfonsina e quel ei miedi e sa quei,“ replica mia sora decisivamein.

„Jeu sun buca da siu meini“, gi mumma. „ Jeu creiel, che ti hagies giu oz in aunghel che ha pertgirau tei.“

„Pertgei?“

„Ti eis currida sur via via senza dar adatg.“ Mia sora ei surstada e vegn tut cotschna. „Danunder sas ti quei?“ „Ina vischina ha observau tei.“

Ei constat. Ella fuss bunamein vegnida blessada oz dad in auto. Igl automobilist ha smanatschau viers ella cul det e tibau tut gritentaus.

Dallas autras caussas han ils geniturs percletg negin idea.

Mia sora ed jeu essan sesi oz sin in rom sec dil tscherscher en nies curtgin senza ch'el rumpi. E nus havein pescau nossa balla per dar ballapei riscadamein ord il puoz. Suentar essan nus revì sur in aulta seiv. E mia sora ei ruclada cun siu velo. Ed ussa schai ella bein protegida en siu letg. Mo in pign sgrefel vid il schanugl regorda aunc a quella aventura. Era jeu schaiel saunamein en miu letg.

Jeu e mia sora mirein in siper l'auter e sefultschein sut il tapet. Avon che sedurmentar gi mia sora a mi: „Damaun stoi jeu aunc inagada discuorer cun mia amitga Alfonsina sur dad aunghels.

Vitus Dermont